

雷公炮製藥性解

卷二

草部中

玄參。味苦鹹。性微寒無毒。入心肺腎三經。主腹中寒熱積聚。女子乳癰諸疾。補腎氣。除心煩。明眼目。理頭風。療咽喉。消癭瘤。散癰腫。解熱毒。惡黃耆。乾薑。大棗。山茱萸。反藜蘆。勿犯銅器。餌之噎喉損目。

按玄參氣輕清而苦。故能入心肺。以清上焦之火。體重濁而鹹。故能入腎部。以滋少陰之火。所以積聚等證。靡不療之。

雷公云。凡採得須用蒲草重重相隔。入甑蒸兩伏時。後出晒乾。使用時勿令犯

明 雲間 李中梓士材編輯
清 吳門 王子接晉三重訂

鄞縣 曹赤電炳章校點

銅器。鉶之墮人喉。損人目。揀去蒲草用之。

丹參。味苦。性微寒。無毒。入心經。養神定志。破結除癥。消癰散腫。排膿止痛。生肌長肉。治風邪留熱。眼赤狂悶。骨節疼痛。四肢不遂。破宿血。補新血。安生胎。落死胎。理婦人經脈不調。血崩帶下。

按丹參色赤屬火。味苦而寒。故入手少陽經。以療諸般血證。

苦參。味辛。性寒。無毒。入胃大腸肝腎四經。主結氣積聚。伏熱黃疸。腸風燥渴。溺有餘瀝。逐水消癰。明目止淚。去溼殺蟲。療大風及一切風熱細疹。以糯米泔浸一宿。去浮面腥氣。曬用。玄參爲使。惡貝母。漏蘆。兔絲子。反藜蘆。

按苦參屬水。有火。性下降。本入少陰心。又入手足陽明及足厥陰經者。以其善主溼也。蓋溼勝則生熱。熱勝則生風。而結氣等證。從茲有矣。今以苦參燥溼。治其本也。東南卑溼。尤爲要藥。丹溪曰。能峻補陰氣。或得之而腰重者。以其氣降而不升。非傷腎也。

雷公云。凡使不計多少。先須用糯米濃泔浸一宿。上有腥穢氣。並在水面上浮去。須重重淘過。卽蒸。從已至申。出曝乾。細剉用之。

紅花。味辛。性溫無毒。入心肝二經。逐腹中惡血。而補血虛。除產後敗血。而止血暈。療跌撲損傷。瘡毒腫脹。老人血少便結。女子經閉不行。催生下胎衣及死胎。酒漬用。其苗生搗敷腫毒。其子吞數粒。主天行痘瘡不出。

按紅花下行血海。宜入足厥陰而逐血。潔古云。苦溫爲陰中之陽。故又入手少陰而補血。然長於行血。欲其補血須少用。或佐補劑。

三稜。味苦。性平無毒。入肺脾二經。主行氣行血。多年癥癖如石。能消爲水。麵裹煨醋炒用。

按三稜爲血中氣藥。脾裹血。肺主氣。宜並入焉。蓋血隨氣上。氣聚則血下流。故生癥癖之患。非三稜不治。然有斬關之勢。虛人忌之。

蓬莪朮。味苦辛。性溫無毒。入肺脾二經。開胃消食。破積聚。行瘀血。療心疼。除腹痛。利月經。主奔豚。定霍亂。下小兒食積。

按蓬莪朮與三稜相似。故經絡亦同。但氣中血藥爲少異耳。性亦猛厲。但能開氣。不能益氣。虛人禁之。乃大全謂氣短不能續者亦宜用之。過矣。卽大小七香丸。集香丸。都用以理氣。豈用以補氣乎。欲其先入血則醋炒。欲其先入氣則火

炮。三稜亦然。

雷公云。凡使於沙盆中用醋磨令盡。然後於火畔吸令乾。重篩過用之。

天麻。味辛。性平。無毒。入肝膀胱二經。療大人風熱眩暈。治小兒驚悸風癰。祛諸風麻痺。不仁。主癰瘰。語言不遂。利腰膝。強筋力。活血脈。通九竅。利周身。療癰腫。淫紙裹煨用。無畏忌。苗名赤箭。主用略同。

按天麻去風。故入厥陰。去溼。故入膀胱。真有風溼。功效若神。癰腫之證。溼生熱也。宜亦治之。赤箭用苗。有自表入裏之功。天麻用根。有自內達外之理。不宜同劑。反致無功。

雷公云。凡使勿用銜風草。緣與天麻相似。只是葉莖不同。其銜風草根莖。瓣葉皆自有青點。使銜風草根。切勿使天麻。二件誤用。即令人有腸結之患。修事天麻十兩。用蒺藜子一鎰。緩火熬煎。熟後便先安置天麻十兩於甑中。只用火熬過。蒺藜子蓋內外再用三重紙蓋。並繫從已至未時。又出蒺藜子。再入熬炒。存前天麻瓶內。用炒蒺藜子於中。依前蓋。又隔一伏時。取出。如此七遍。瓶盛出後。用布拭上氣汗。用刀劈焙之。細剉。單搗。若用銜風草。修事法亦同天麻一般。

南星。味苦辛。性平有毒。入脾肺二經。主中風牙關緊閉。痰盛麻痺。下氣破堅積。消癰腫。利胸膈。散氣墮胎。搗敷疥癬瘡毒。并蛇蟲咬傷。沸水泡七次。以牛膽汁收其沫入膽。久懸風處更佳。畏附子。乾薑。生薑。

按肺受風邪。脾多痰飲。南星專主風痰。故並入二經。味辛主散。所以消癰墮胎。及療疥癬等疾。大抵與半夏同功。但半夏辛而能守。南星辛而不守。其燥急之性。甚於半夏。故古方以牛膽苦寒之性制其燥烈。且膽又有益肝鎮驚之功。小兒尤爲要藥。丹溪曰。南星欲其下行。以黃柏引之。

秦艸。味苦辛。性微溫無毒。入胃大小腸三經。主骨蒸。腸風瀉血。活筋血。利大小便。除風溼。療黃疸。解酒毒。去頭風。菖蒲爲使。羅紋者佳。

按秦艸苦則湧洩爲陰。故入大小腸以療諸溼。辛則發散爲陽。故入陽明經以療諸風。骨蒸之證。亦溼勝風溼所致。宜並理之。

雷公云。凡使秦艸。須於脚文處認取左文。列爲秦。治疾。右文列爲艸。即發脚氣。凡用秦艸。以布拭去黃白毛盡。然後用還元陽浸一宿。日曝乾用之。

遠志。味苦。性溫無毒。入心腎二經。補不足。除邪氣。益智。明耳目。寧怔忡。定驚悸。

利九竅。治健忘。壯陽道。益精氣。長肌肉。助筋骨。及婦人血禁失音。小兒驚風客忤。皮膚熱。面目黃。久服悅顏色延年。甘草湯泡去心用。得茯苓。冬葵子。龍骨。良。畏珍珠。藜蘆。蜚蠊。齊蛤。忌諸肉。生葱。冷水。殺天雄。附子毒。葉名小草。主夢洩。

按遠志苦入心經。溫能滋腎。而不足等證。咸本二經。故都治之。

雷公云。遠志凡使先須搥去心。若不去心。服之令人悶。去心了。用熟甘草湯浸一宿。漉出。曝乾用之。

破故紙。味苦辛。性大溫無毒。入腎經。主五勞七傷。陽虛精滑。腰痛膝冷。囊溼腎寒。酒浸一宿。水浸三日。蒸用。惡甘草。忌羊肉。羊血。藟藟。

按破故紙苦能堅腎。且性大溫。故專走少陰。然氣燥不宜多用。命門有火及津枯者忌之。

葫蘆巴。味苦。性溫無毒。入腎膀胱二經。得桃仁。大茴。療膀胱疝氣。得硫黃。黑附。理腎臟虛寒。

按葫蘆巴雖入腎與膀胱。攷諸本經。無佐使不能獨成功也。

何首烏。味苦甘澀。微溫無毒。十二經絡所不收。觀其藤夜交。乃補陰之劑也。消瘰

癰。散癰腫。療五痔。止腸風。烏鬚髮。美容顏。補勞瘦。助精神。長肌肉。堅筋骨。添精髓。固腰膝。除風溼。明眼目。及治婦人產後帶下諸血。老年尤爲要藥。久服令人多子延年。去羸皮。酒浸拌黑豆末蒸之水中。復加黑豆及酒。曬乾。九次爲度。春夏採鮮者。赤白合用。兼補氣血。茯苓爲使。畏猪羊血。無鱗魚。蘿蔔忌鐵器。

按何首烏大能補益。全在蒸曬如法。大者剖開。其中有鳥獸山嶽之形。亦神物也。傳云。五十年如拳大。號山奴。服之一年。髭鬚青黑。百年如碗大。號山哥。服之一年。顏色紅悅。一百五十年如盆大。號山伯。服之一年。齒落重生。二百年如斗大。號山翁。服之一年。顏如童子。行及奔馬。三百年如栲栳大。號山精。服之一年。延齡益算。純陽之體。久服成仙。邇來漸能用之。惜未能如法製之耳。

骨碎補。味苦。性溫。無毒。入腎經。主折傷。補骨碎。去毒風。疼痛。固齒牙。療蝕瘡。殺諸蟲。去毛。細剉。蜜拌蒸。曬乾用。

按骨碎補溫而下行。專入腎家。以理骨病。齒者骨之餘也。故能固之。又能殺蟲者。蓋以蟲生於溼。今能去毒風。而蟲之巢穴搗矣。豈能生耶。

雷公云。凡使採得後。先用銅刀刮去上黃赤毛盡。便細切。用蜜拌令潤。架柳甑

蒸一日後。出曝乾用。又乾寧記云。去毛細切後。用生蜜拌蒸。從巳至亥。照前曝乾搗。一用炮豬腎空心吃。治耳鳴。亦能止諸雜痛。

威靈仙。味苦。性溫無毒。入十二經。主諸風。宣通五臟。去腹內冷滯。心胸痰水。久積癰癖。膀胱惡水。腰膝冷疼。兩足腫滿。又療折傷。忌麵及茶茗。牛肉牛乳。採時不聞流水聲。鐵脚者佳。

按威靈仙可升可降。爲陰中之陽。故於經絡無所不入。丹溪云。屬水。故於肝臟多功。治痛風之要藥也。其性好走。多服疏人五臟臭氣。然風注痛疼。非此不除。中病卽已。不宜多用。

牛膝。味苦酸。性平無毒。入腎經。補精氣。利腰膝。填骨髓。除腦漏。祛寒溼。破血結。通月經。墮胎孕。理膀胱氣化遲難。陰中作痛欲死。去蘆酒浸一宿用。惡龜甲。螢火。陸英。畏白前。白蘚皮。忌牛肉。

按丹溪云。牛膝引諸藥下行。宜入足少陰經以理諸疾。婦人得之。應歸血海。故行血有功。脾虛氣陷及腿膝腫者。不宜用之。有二種。土牛膝。所稟薄。故短而細。主破血氣。川牛膝。所稟厚。故肥而長。主補精髓。竹木刺入肉。塗之可出。

雷公云。凡使去頭並塵土了。用黃精自然汁浸一宿。漉出。細剉。焙乾用。
黃精味甘。性平無毒。入脾肺二經。補中益氣。除風溼。安五臟。駐顏色。久服延年。
按黃精甘宜入脾。潤宜入肺。久服方得其益。實勝於根。花勝於實。但難辨耳。與
鉤吻相似。然鉤吻有毛。鉤二箇。誤服殺人。

雷公云。凡使勿用鉤吻。真似黃精。只是葉有毛子二箇。是則認處。誤服害人。黃
精葉似竹葉。凡採得以溪水洗淨後蒸。從已至午。刀薄切。曬乾用。
蒲黃味苦。性平無毒。入肝經。生用則性滑。主行血。通經墮胎。消瘀排膿。利小便。祛
心腹膀胱熱。炒用則性澀。主止血。除崩漏帶下。一切吐衄血。痢血。尿血。腸風下血。
止精洩。定兒枕痛。忌見鐵器。宜隔紙焙黃。蒸之。再焙用。

按蒲黃主血。而肝藏血。故獨入焉。仙經用之。亦以多功於血耳。

雷公云。凡使勿用松黃並黃蒿。其二件全似。只是味異。凡飲使蒲黃。須隔三重
紙焙。令色黃。蒸半日。却焙。令乾用之妙。

續斷味苦辛。性溫無毒。入肝腎二經。主傷寒不足。折傷金瘡。諸癰腫。治漏尿血。益
氣力。續筋骨。散諸血。煖子宮。療腰痛。縮小便。止夢泄。利關節。調血和血。生肌止痛。

酒浸一宿。焙乾用。地黃爲使。惡雷丸。

按腎主骨而藏精。肝主筋而藏血。續斷補精血而理筋骨。宜入此二經矣。胎產之證。尤爲要藥。

雷公云。凡使勿用草茆利。真似續斷。若誤用。服之令人筋軟。採得後。橫切剉之。又去向裏硬筋了。用酒浸一伏時。焙乾用。

益母草。味辛甘。性微寒無毒。入諸陰經。主行血養血。安胎利產。消浮腫惡毒疔瘡。治頭風血虛目疾。癰疹發癢。堪作浴湯。子名茺蔚。益精明目。除水氣。療血逆大熱。頭痛心煩。下腹中死胎。理產後血脹。

按益母本功治血。故入諸陰之經。行血而不傷新血。養血而不滯瘀血。所以爲胎產聖藥。又能消瘡腫者。取其行血。而且辛甘發散也。

肉蓯蓉。味甘酸鹹。性微溫無毒。入命門經。興陽道。益精髓。補勞傷。強筋骨。主男子精泄尿血。溺有遺瀝。女子癥痛崩帶。宮寒不孕。酒浸一宿。去浮甲。劈破中心。去白膜。蒸半日。酥炙用。潤而肥大者佳。

按蓯蓉性溫。爲濁中之濁。故入命門而補火。惟尺脈弱者宜之。相火旺者忌用。

多服令人大便滑。

雷公云。凡使先須清酒浸一宿。至明。以板刷去上沙土。浮甲盡。劈破中心。去白膜一重。如竹絲草樣。是此偏隔人心。前氣不散。令人上氣不出。凡使先用酒浸並刷淨。却蒸。從午至酉出。又用酥炙佳。

鎖陽味甘鹹。性溫無毒。入腎經。補陰虛。固髓。潤大便燥結。宜酥炙用。

按鎖陽鹹溫。宜入少陰。本經不載。丹溪續補。以其固精。故有鎖陽之名。主用與菟蓉相似。老人枯閉。最爲要藥。大便不實者忌之。

車前子味甘。性寒無毒。入肝膀胱小腸三經。主淋瀝癰閉。陰莖腫痛。溼瘡泄瀉。赤白帶濁。血閉產難。炒細研用。常山爲使。根葉主金瘡。功用同子。

按車前子利水。宜入足太陽。行血。宜入足厥陰。然逐水之劑。多損於目。本草云。明目者。以其清肝熱。如釜底抽薪。非因洩水之功也。

紫菀味苦辛。性溫無毒。入心肺二經。主咳逆上氣。痰喘吐衄。補虛勞。安五臟。水洗淨。蜜炙用。款冬爲使。惡天雄。瞿麥。雷丸。遠志。畏茵陳蒿。紫色潤軟者佳。

按紫菀苦能入心。而泄上炎之火。辛能入肺。而散結滯之氣。行氣養血。專治血

痰爲血癆要藥。

雷公云。凡使先去髭有白練色者。號曰羊鬚草。自然不同。採得後去頭上了。用東流水淘洗令淨。用蜜浸一宿。至明於火上焙乾。用凡修治一兩。用蜜二分。百部味甘苦。性微寒。有小毒。入肺經。主肺熱咳逆。傳屍骨蒸。殺疔疣。寸白蟲及風竹刀劈開。去心。酒浸用。

按百部專療咳嗽。宜入肺經。而小毒。故能殺蟲也。

雷公云。凡採得後。用竹刀劈破。去心皮。花作數十。於簷下懸。令風吹。待乾後。却用酒浸一宿。漉出焙乾。細剉。用葱一顆。自有八十三條者焙乾。號曰地仙苗。若修事餌之壽長。

百合味甘。性平無毒。入心肺大小腸四經。主鬼魅邪氣。熱咳吐血。潤肺寧心。定驚益志。攻發背。消癰腫。除脹滿。利二便。

按百合性潤。故入心肺諸經。雖能補益。亦傷肺氣。不宜多服。

款冬花味苦辛。性溫無毒。入心肺二經。主中風喉痺。肺痿肺癰。潤心肺。止咳嗽。除痰喘。定驚悸。洗肝明目。杏仁爲使。得紫苑良。惡早莢。硝石。玄參。畏貝母。辛夷。麻黃。

黃耆、黃芩、黃連、青蘗。

按款冬辛甘發散爲陽。故入心肺。以理痰嗽等證。畏惡甚多。用者審之。

雷公云。凡採得須去向外裏花蕊殼並向裏實如粟零殼者並枝葉。甘草水浸一宿。却取款冬葉相拌。過一宿夜。晒乾去葉用。

馬兜鈴味苦性寒無毒。入肺經。主清肺。除咳嗽痰喘。治血痔漏瘡。根名青木香。下毒甚速。

按馬兜鈴專主手太陰經。何以治痔漏之證也。良以肺與大腸相爲表裏。肺移熱於大腸。故有此證。今清其表而裏病自愈矣。

雷公云。凡使採得後去葉並蔓。用生絹袋盛。於東屋角畔懸令乾。劈開去隔膜。取淨子焙用。

青黛味苦甘性寒無毒。入肝脾二經。除鬱火。解熱毒。止下痢。殺諸蟲。治小兒疳蟲消瘦。驚癇邪氣。脣焦口渴。上膈稠痰。療傷寒赤斑。面黃鼻赤。

按青黛色青屬木。味甘屬土。宜入厥陰太陰。以理諸熱之證。

甘菊味甘微苦性平無毒。入肺脾肝腎四經。能補陰氣。明目聰耳。清頭風及胸中。

煩熱。肌膚溼痺。枸杞根。桑白皮。蒼白朮爲使。

按丹溪曰。菊花屬金。而有土與水。大能補陰。宜入肺肝等經。蓋煩熱諸證。皆由水不足而火炎。得此補陰。則水盛而火自息矣。須用味甘者佳。若苦者爲苦菊。大傷胃氣。慎之。

薏苡仁。味甘。微寒無毒。入肺脾肝胃大腸五經。利腸胃。消水腫。祛風溼。療腳氣。治肺痿。健脾胃。

按薏苡仁總理溼熱。故入上下五經。蓋受熱使人筋攣。受溼使人筋緩者。可用。若受寒使人筋急者。忌之。勢力和緩。須多用見效。

雷公云。凡使勿用秬米。顆大無味。其秬米。時人呼爲粳秬是也。若薏苡仁顆小。色青味甘。咬著黏人齒。用一兩。以糯米一兩同熬。令糯米熟。去米取使。若更以鹽湯煎之。則是一般修事。

牡丹皮。味辛苦。性微溫無毒。入肝經。治一切冷熱氣血凝滯。吐衄血瘀積血。跌撲傷血。產後惡血。通月經。除風痺。催產難。畏兔絲子。忌蒜。

按丹皮主用。無非辛溫之功。禹錫等言其治冷。當矣。本草曰性寒。不亦誤耶。夫

肝爲血舍。丹皮乃血劑。固宜入之。本功專行血。不能補血。而東垣以此治無汗骨蒸。六味丸及補心丹皆用之。蓋以血患火爍則枯。患氣鬱則新者不生。此劑苦能瀉陰火。辛能疏結氣。故爲血分要藥。

雷公云。凡採後日乾。用銅刀劈破。去骨細剉。如大豆許。用清酒浸蒸。從巳至未。出日曬乾用。

兔絲子。味甘辛。性平無毒。入腎經。主男子腎虛精寒。腰膝冷痛。莖中寒。精自出。溺有餘瀝。鬼交泄精。久服強陰堅骨。駐顏明目。輕身。令人多子。浸五宿。蒸熟。杵作餅。曬乾。研用。山藥。松脂。爲使。惡蘢菌。

按雷公云。兔絲子稟受中和。凝正陽氣。故宜入補少陰。溫而不燥。不助相火。至和至美之劑。宜常用之。

雷公云。凡使勿用天碧草子。其樣真相似。只是天碧草子。味酸澀。並黏。不入藥用。其兔絲子稟中和正陽之氣所結。補衛氣。助人筋脈。採得去粗薄殼。用苦酒浸二日。漉出。用黃精自然汁浸一宿。至明。微用火煎至乾。入臼中熱燒。鐵杵三千餘成粉。并黃精自然汁與兔絲子相對用之。

茴香。味辛甘。性溫無毒。入心脾膀胱三經。主一切臭氣。腎臟虛寒。癰疽腫痛。及蛇傷。調中止嘔。下氣寬胸。又有一種小茴。氣味稍薄。然治膀胱冷痛。疝氣尤奇。

按茴香氣厚。爲陽中之陽。故入少陰太陰太陽。以理虛寒諸證。雖辛溫快脾。亦能耗氣。今內相都入煎燂油膩之物。與火無異。久則致疾。深宜戒之。

砂仁。味辛。性溫無毒。入脾胃肺大小腸膀胱腎七經。主虛寒瀉痢。宿食不消。腹痛心疼。咳嗽。腹滿奔豚。霍亂轉筋。祛冷逐痰。安胎止吐。下氣化酒食。炒去衣研用。

按砂仁爲行散之劑。故入脾胃諸經。性溫而不傷於熱。行氣而不傷於尅。太陰經要劑也。宜常用之。

白豆蔻。味辛。性溫無毒。入肺脾胃三經。主消寒痰。下滯氣。退目中翳。止嘔吐。開胃進食。除冷瀉痢及腹痛心疼。炒去衣研用。白而圓滿者佳。

按白豆蔻辛宜入肺。溫爲脾胃所喜。故并入之。大抵辛散之劑。不能補益。藥性稱其補上焦元氣。恐無是理。但不甚尅削耳。世俗不察而信之。誤人不小。治寒氣神效。肺胃中有火及虛者忌之。

肉豆蔻。味苦辛。性溫無毒。入肺胃二經。療心腹脹痛。卒成霍亂。脾胃寒弱。宿食不

消。虛冷瀉痢。小兒傷乳吐瀉。尤爲要藥。糯米粉裹煨。忌見鐵器。

按肉豆蔻卽肉果。辛溫之性。宜入脾胃。有未去之積者。不可先用。

雷公云。凡使須以糯米作粉。使熱湯搜裹豆蔻於糠灰中炮。待米團子焦黃熟。然後出去米。其中有子取用。勿令犯鐵。

草豆蔻。味辛。性熱無毒。入脾胃二經。主風寒客邪在胃。其餘與白者同功。而性尤燥急。不及白蔻有清高之氣。

按草豆蔻辛溫發散。故入脾胃而主風寒。多食大損脾胃。衍義謂其虛弱不食者宜此。恐非。胃火者大忌。

雷公云。凡使須去蒂并向裏子後。取皮。用茱萸同於鍋上緩炒。待茱萸微黃黑。卽去茱萸。取草豆蔻皮及子。杵用之。

草果。味辛。性溫無毒。入脾胃二經。主瘧疾胸腹結滯嘔吐。胃經風邪。

按草果辛溫發散。與草蔻同功。故經絡亦同。多食亦損脾胃。虛弱及胃火者亦忌之。

菖蒲。味辛。性溫無毒。入心脾膀胱三經。主風寒溼痺。欬逆上氣。鬼疰邪氣。通九竅。